

## Litrichean

A h-uile uair a nithear cunntas air àireamh nan daoine an Albainn tha sinn a' faicinn le mulad gum bheil iadsan a tha cleachdadh na Gàidhlig a' fàs nas lugha is nas lugha.

Tha so a' ruighinn ar cridhe nuair a ghabhas sinn beachd air gu dé a tha na h-Eireannaich is na Cuimrich a' dèanamh 'nam feadh fhéin is gu sònruichte anns na sgoiltean.

Ach mar a thuirt an sean-fhacal, "Cha dean bruidhinn feum."

Am bheil na Gaidheil a' dol a bhith 'nan tàmh le làmhnan paisgte mar dhaoine gun dòchas, a' feitheamh air an latha nuair a bhios cànanan ar n-athraichean cho marbh ris an sgadan?

Ma tha sinn air son an latha sin a sheachnadh, feumaidh sinn gluasad. Tha an *Gairm* a' toirt cuiridh dhuinn a bhith air bonn. 'Se mo mhiann gum faighear e anns gach dachaidh is sgoil air feadh na Gaidhealtachd.

An t-Ard Urr. DOMHNALL CAIMBEUL,  
Ard-Easbuig, Ghlaschu.

'Se mo rùn dhuibh soirbheachadh agus sonas anns an obair mhóir a tha air thoiseach oirbh. Tha mi 'n dòchas gum bi cluas a' Ghaidheil anns gach tìr fosgailte do bhur *Gairm* agus gun toir gach cridhe am fad 's am farsuinn fàilte agus aoidheachd do gach àireamh mar a dh'fhàgas i a' bheairt.

Bithidh sùil againn gum faigh sinn uaibh gliocas aig am bi dàimh dhùth do ghliocas nan daoine aig an robh am foghlum firinneach, ged nach robh eòlas aca air sgoil no air oilthigh.

Thugaibh dhuinn gliocas agus ceòl nan gleann 's nan tonn, agus sin ann an Gàidhlig nach d'fhuair riann casad o'n Bheurla.

Buaidh, mata, gun robh leibh, agus againne—aig 'ur làimh—bitheadh nithean maiseach air am bi cuimhne bhuan!

An t-Oll. Urr. ALASDAIR MACDHOMHNAILL,  
Ministir Eaglais Chaluim Chille an Glaschu.

Tha na Gàidheil òga a tha 'nam fir-deasachaidh air an Leabhraan so airidh air gach cuideachadh agus brosnachadh as urrainn Gàidheil Alba a thoirt dhaibh. Theagamh nach dèan e feum do *Ghairm* leigeil leis a' chù a tha 'na chadal cadal, ach bidh fiughair againn gum bi gach cuspair a tha air a thogail air a rannsachadh ann an dòigh a bhitheas glic agus cothromach. Ach ged nach biodh sin daonnan mar sin tha sinn a' cur meal-an-naidheachd air *Gairm* oir is ann an Gàidhlig a théid a sgrìobhadh. Tha feum againn air a leithid agus tha sinn an dòchas gun dean iadsan is urrainn Gàidhlig a leughadh—agus tha suas ri ceud mìle dhiubh sin ann—an dìcheall ann a bhith a' ceannach an Leabhraan so. Tha a' Bheurla a' tolladh a stigh air iomadh dòigh. Cluinnibh agus freagraibh *Gairm*.

IAIN M. MAC'ILLE NA BRATAICH,  
Ceann-suidhe a' Chomuinn Ghaidhealaich.